

**Uunga siunnersuut: Piginnaangorsaaqqinnissamut ikiorsiisarneq pillugu Inatsisartut peqqussutaata allangortinneqarneranik Inatsisartut inatsisaat nr. xx, xxx 2017-**

**imeersoq**

*(Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)*

**pillugu**

**Inuussutissarsiornermut Aatsitassanullu Ataatsimiititaliap**

**siunnersuutip aappassaaneerneqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Peter Olsen, Inuit Ataqtigii, siulittaasoq

Inatsisartunut ilaasortaq Randi V. Evaldsen, Demokraatit, siulittaasup tullia

Inatsisartunut ilaasortaq Jens-Erik Kirkegaard, Siumut

Inatsisartunut ilaasortaq Nikolaj Jeremiassen, Siumut

Inatsisartunut ilaasortaq Knud Kristiansen, Siumut

Inatsisartunut ilaasortaq Kelly Berthelsen, Inuit Ataqtigii

Inatsisartunut ilaasortaq Per Rosing-Petersen, Partii Naleraq

**1. Siunnersuutip imarisaa siunertaalu**

Allanguutissatut siunnersuutigineqartumut tunngaviupput kommuninit aamma Nunami Namminermit Suliffeqarfimmut Siunnersuisartunit kissaatit pisariaqartitallu. Taamaalillunilu Inatsisartut peqqussutaannik atuuttumik erseqqissaaneq matumani pineqarpoq. Piginnaangorsaaqqinnissamik ingerlassap aallartinnera sioqqullugu qulaajaanissamut tunngatillugu maleruagassat atugaaneranni paatsuunganartoqartoq paasinarsisimavoq, taamaattumillu § 4 erseqqissaavigineqarpoq, taamaalilluni sivilisunerusumik piginnaangorsaaqqinnissap aallartinnera sioqqullugu qulaajaasooqartussaamera erseqqissarneqarluni.

Qulaajaanermik ingerlatsinissaq piginnaangorsaaqqinnissamik qinnuteqartunut tamanut atuuppoq, tassuunakkullu qulakkeerneqassalluni qinnuteqartut eqqortumik inissinneqarnissaat. Taamaalilluni piginnaangorsaaqqinnissaq imaluunniit eqaannerusumik

suliffeqarnek tulluartut iluarsissutaanersoq imaluunniit qinnuteqartoq suliassanik allanik pisariaqartitsinersoq qulaajaanermi isummerfigineqassaaq.

Siunnersuummi eqaannerusumik suliffeqarnek, inuiaqatigiinnut tamarmiusunut iluaqutaasumik suliffeqarfiup attaveqarfiuinnarnissaanut arlalinnut sulisinnaassutsiminnik annikillisisimasunut pitsaassusilimmik iluarsissutaasinnaasoq pillugu maleruagassat erseqqissaavigineqarput.

## **2. Siunnersuutip Inatsisartunit siullermeerneqarnera**

Siunnersuut Inatsisartunit nalinginnaasumik tapersernejartoq siullermeerinninnermi paasinarsivoq. Inatsisartut peqqussutaata atuuttup erseqqissaavigineqarnissaanik siunertaqarnerusutut siunnersuut oqaaseqartunit arlalinnit isigineqarpoq.

## **3. Tusarniaanermut akissutit**

Siunnersuut piffissami 19. december 2016-imit 23. januar 2017-imut ukununga tusarniaassutigineqarpoq:

Sulisitsisut (GE), NUSUKA, SIK, KANUKOKA, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq, Namminersorlutik Oqartussani Naalakkersuisoqarfiit tamarmik.

Siunnersuut aamma piffissami tassani Namminersorlutik Oqartussat tusarniaanerni nittartagaaniitinneqarpoq.

Makkunanit tusarniaanermi akissutit tiguneqarput:

Aningaasaqarnermut Naalakkersuisoqarfik, Naalakkersuisut Siulittaasuata Naalakkersuisoqarfia, Sulisitsisut, KANUKOKA, Kommune Kujalleq, Kommuneqarfik Sermersooq, Isumaginninnermi Naammagittaalliuuteqartarfimmi allattoqarfik aamma Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik.

Tusarniaanermi akissutit tamarmik imarisaat tamakkerlugit Inatsisartuni suliarinnittutut ataatsimiititaliamut ilanngullugit nassiunneqarput.

Siunnersuutip annertunnginnera eqqarsaatigalugu piffissaq tusarniaaffiusoq naammaginatut Inuussutissarsiornermut Aatsitassanullu Ataatsimiititaliamit isigineqarpoq piffissallu tusarniaaffiusup sivilissusia annertunerusumik oqaaseqaatissaqarfigineqarani. Kiisalu tusarniaaffigineqartut oqaaseqaataat naammattumik annertussusilimmik Naalakkersuisunit ilanngunneqarlutillu issuaavigineqarsimasutut ataatsimiititaliamit isigineqarput. Aammalu tusarniaaffigineqartut oqariartuutaannut isumakuluutaannullu sanilliullugu allannguutissatut

siunnersuuteqarnermi siunertaq siunnersuutillu imarisaa Naalakkersuisut siunnersuummut nalinginnaasumik nassuiaatini itilerlugillu nassuiaatigaat.

#### **4. Ataatsimiititaliap siunnersuummik suliarinninnera**

Piginnaangorsaaqqittarneq aammalu eqaannerusumik suliffeqarneq pillugit maleruagassat erseqqissarneqarnissaat matuminnga siunnersuuteqarnermi siunertaamat aallarniutigalugu oqaatigineqassaaq, taamaaliornikkut kommunit taakkuninnga aqutsinerat oqinneruleqqullugu. Piginnaangorsaaqqinnissamik qinnuteqartoqarneranut atatillugu sivilisinerusumik piginnaangorsaaqqinnissap aallartinnissaa sioqqullugu pineqartut ataasiakkaat pillugit qulaajaasoqartalernissaa ataatsimiititaliamit pitsaasutut isigineqarpoq. Aammalu ataatsimiititaliap paasinninnera malillugu ikiorsiissutit suut ataasiakkaanut neqeroorutigineqarnissaasa paasiniarnissaannut qulaajaanermik ingerlatsineq aamma atorneqassaaq. Innuttaasut ataasiakkaat atukkaminut sanilliullugu eqqornerusumik inissinneqarsinnaanerannut periarfissat pitsanngornerattut tamanna ataatsimiititaliamit isigineqarpoq. Aqutsinikkut iliuusissat inissiinissamut kommuninut pitsaannerusumik periarfissiisut kommunit aqutsinerminni siunissami nukinnik atuilussinnarnerisa killilersimaarneqarnissaanut aamma peqataaqataassapput.

Inuit arlaannik pissuteqartumik sulisinnaassutsimikkut killeqaraluarlutik imminut pilersornissamut piomassuseqarlutillu kissaateqartut ajornangippat tamatumunnga ikiorneqarnissaat nunatsinni inuiaqatigiinnit anguniarneqartariaqarpoq. Inunnut siusinnerusukku suliffeqarsimasunut massakkulli killilimmik sulisinnaassuseqalersimasunut tunngatillugu eqaannerusumik suliffeqarsinnaanermut maleruagassat inatsisissatut siunnersuutikkut ugguuna erseqqissaatigineqarput. Eqaannerusumik suliffeqarneq inuit killilimmik sulisinnaassuseqalersimasut suliffeqarnermut attuumassuteqaannarnissaannut sakkussatsialaasoq Naalakkersuisut assigalugit ataatsimiititaliaq isumaqarpoq. Suliffeqarnerput inunnut timikkut allatigulluunniit ajoquteqarnertik pissutigalugu tamakkiisumik tunniussaarsinnaangikkaluarlutik suliffeqarfimmut inuiaqatigiinnullu suli iluaqutaasinnaassuseqartunut aamma inissaqartitsisariaqarpoq.

Qulaajaanermik ingerlatsineq pillugu nalunaarutinik ilitsersuutinillu erseqqinnerusunik inatsisissatut siunnersuut una malitseqarumaartoq Naalakkersuisut siunnersuummut nalinginnaasumik nassuiaatini oqaatigaat. Naalakkersuisut tamatumani anguniagaat Inuussutissarsiornermut Aatsitassanullu Ataatsimiititaliamit tamakkiisumik taparserneqarpoq. Kommunimi sulisut ilitsersuutinik qulaajaanermik ingerlatsinermik suliaqarnermut oqilisaataasinnaasunik atugassaarpata inatsisissatut siunnersuutikkut anguniarneqartoq eqquutsinneqarsinnaanerusetut ataatsimiititaliamit isigineqarpoq. Tamatuma pinissaata qulakkeerneqarnissaanut Naalakkersuisut pisariaqartunik iliuuseqarumaartut Inuussutissarsiornermut Aatsitassanullu Ataatsimiititaliamit tutsuigineqarpoq.

Kiisalu piginnaanngorsaaqqinnissaq pillugu inatsimmik Naalackersuisut kingusinnerusukkut annertunerusumik iluarsaaqqinnissaannut aporfissaqanngitsoq Naalackersuisut inatsisissatut siunnersuummut nalinginnaasumik nassuiaatini oqaatigigaat Inuussutissarsiornermut Aatsitassanullu Ataatsimiititaliamit aamma maluginiarneqarpoq.

#### **5. Siunnersuutip aningaasaqarnikkut kingunerisassai**

Siunnersuutip akuerineqarnera aningaasaqarnikkut kinguneqassanngitsoq siunnersuummut nalinginnaasumik nassuiaatini allassimavoq. Tamatuma saniatigut siunnersuutip oqartussaasunut taamatullu inuussutissarsiortunut allaffissornikkut oqilisaataanissaa naatsorsuutigineqartoq Naalackersuisut nalinginnaasumik nassuiaatini oqaatigigaat ataatsimiititaliamit maluginiarneqarpoq. Tunngavissat pigineqartut tunngavigalugit allatut naliliinissaminut ataatsimiititaliaq tunngavissaqanngilaq.

#### **6. Ataatsimiititaliap inassuteqaataai**

Siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Peter Olsen,  
Siulittaasoq

---

Randi V. Evaldsen,  
Siulittaasup tullia

---

Jens-Erik Kirkegaard

---

Nikolaj Jeremiassen

---

Knud Kristiansen

---

Kelly Berthelsen

---

Per Rosing-Petersen